

**Geoffroy, Stéphane François -
candidat / Dieuxivoye, Bertin -
président. - An recèns nato, lac
recèns enixae matris ?**

1703.

***Paris : Apud viduam Francisci
Muguet, Regis & Facultatis
Medicinae Typographi***

Cote : ms 2324 n°144

685

144



QUÆSTIO MEDICA,
 CARDINALITIIS DISPUTATIONIBUS
 MANE DISCUTIENDA
 IN SCHOLIS MEDICORUM.

Diē Jovis vigesimâ-nonâ Martii.



M. BERTINO DIEUXIVOYE,
 DOCTORE MEDICO,
 ET ANTIQUIORE SCHOLARUM MAGISTRO,
 P. R. Æ S I D E.

An recens nato, lac recens enixæ matris?

I.

VIX conceptum corpus humanum jam destruitur. Nec instanti diutius vitâ frueretur homo, nisi partes quæ ex ipsius corpore continuò avolant, nutritione restituerentur. Sive hominis primordia in ovo muliebri lateant: Sive illa in maris semine sub vermium specie innatent; hæc eodem, quò Parentis corpus, nutrimento aluntur. Fœtus, post conceptum, in utero matris uberiolem semper in dies nanciscitur alimoniam, non solum nutritionis, sed & accretionis materiem. Fœtus alimentum, Chylus est: Non sanguis maternus, cui nullus ad fœtum aditus. Liquori verò Lacteo viæ sunt apertæ per vasa scilicet lactea, quæ à Mesenterio ad uterum usque protensa in ejus fundum dehiscunt, ubi extremis placentæ vasis connectuntur. Ex utero ad fœtum nullum alium stillare liquorem præter lacteum, probatur evidenter prægnantium brutorum uteri perscrutatione. Si enim levi manu placentula ab utero disjungatur, fluit tantummodò lacteus liquor. Hic succus placentæ venulas subit, & una cum sanguine ad fœtum defertur.



Non omnis in nutritionem impenditur ; sed quod à nutritione superfluum est , id transpiratione exhalatur , & condensatum , Amnii liquorem efformat. Ob rariorem cutis foetus texturam , magisque proinde perspirabilem , uberior primis graviditatis temporibus colligitur hic humor ; proximis contra partui temporibus parcius reperitur , proportionem servatâ ad foetum : Eò quod patentioribus jam aliis viis excipiatur. Hujus humoris fluidior pars renibus , vesicâ & membranâ urinariâ , Allantoidis brutorum vices gerente secernitur. Crassior verò humor ex ventriculi intestinorumque glandulis in eorum cavitatem stillat. Subalbidus in ventriculo deprehenditur , in intestinis , ob admistam bilem , niger , qui Meconii nomine designatur. Hæc recrementa in nato infante fecunda sunt morborum germina , nisi statim ab ortu ex iis liberetur.

I I.

QUÆ ad foetum alimoniam deducebant vasa , in jam nato infante ab officio cessant. Ore novum pabulum sibi quaerit. Sedulo cavendum est , ne novus cibus Meconio inquinetur : Providendum quoque ne viscidiori copiosiorique muco ita fistulae intestinalis parietes oblinantur , ut chyli in venas lacteas per poros intestinorum transitus retardetur aut intercludatur. Si Meconium chylo confusum cum sanguine semel misceatur , crassiori & fetido suo sulphure , agile & blandum sanguinis sulphur deprimit , & sale acriori succorum dulcedinem corrumpit : Unde sanguinis crasis turbatur. Non minus noxia est chyli in intestinis mora , quâ non medio-criter acescit , meconio deinde admistus effervescit impetuosius , non sine tormento. Turbida hæc & tetra mistura , si venas lacteas subeat , ibique hæreat , præterlabentes succos pessimè afflat & cogit : Ulterius si serpat in sanguinem virus illud , novissima mala pejora prioribus producit. Ex hæc utraq; causâ in Infantibus morborum Ilias : Lactis acor & coagulatio , Vomitiones , Alvi Profluvia , ventris Tormina , Ingens vermium Luxuries , Mesenterii obstructions , Abdominis distensio , Hydrops , Tusses , Atrophia , Febres , Motus Spasmodici , Epilepsia , Lithiasis , Rachitis , Variolæ , Morbilli , unde fit ut vel præmaturâ morte rapiatur puer , vel miserrimum spiritum trahat.

I I I.

RE C E N S natis alendis præstò est Lac in matris uberibus : Chylus est cum Lymphâ permistus , Triplici constat substantiâ , Oleosâ quæ Butyrum , Salino-terrestri quæ Caseus , & Salino-aquosâ quæ Serum dicitur. Certis tantum temporibus ad mammas & uterum devehitur. Quibus viis huc deveniat , in muliere adhuc

incertum : Nî per tubulos à ductu Thoracico ad mammas , & à Mesenterio ad uterum usque protensos deferri supponatur , ut in quibusdam lactantibus brutis observatum est. Prægnationis tempore, rarò aliis temporibus , lacte adimplentur mammae. Ut primùm concepit mulier , ejus succi , maximè lymphæ , aurâ seminali afflati lentescunt. Humor , quo madent mammae , jam tum crassior hæret in suis tubulis , quos aliquo cum dolore premit. Exinde vasa uberiori spirituum affluxu tument , & à succis jugiter advenientibus nec facillè comitantibus ultrò distendantur ; hoc modo sternitur via lacti. Lactis indolem variam constituunt diversum genus animalium , diversa eorundem indoles , nec non alimentorum varietas. Ut puero nullum alimentum convenientius est lacte materno , ita recens nato nulla aptior medicina est matris Colostrum. Est autem Colostrum , Lac aquosum & turbatum , quod statim à partu è mammis diffluit.

I V.

IN recens nati commoda non leviter peccat , qui ipsi denegat Colostrum , falsâ impuritatis noxiæ opinione deterritus. Blandum est & à naturâ paratum infantibus Eccoproticum alimentum. Sero enim suo tenacem ventriculi mucum , piceumque intestinorum Meconium diluit : Saleque subacri , quo pollet , intestina vellicat , & ad dejectionem sollicitat. Nec solum alvum repurgat , sed & Mesenterii venas & glandulas expedit à viscidis humoribus quibus infarciuntur ; sicque quod intus læsurum erat , utiliter effunditur , atque liberæ ac mundæ redduntur viæ. Quàm parùm metuit suam culpam pietatem Mater , quæ , naturæ legum oblita , alteri suum infantem nutrici lactandum tam facillè relinquit. Lacti materno nullum par est. Si quando minùs probum sit , convenientius tamen est infanti , quippe qui jam huic in utero assueverit ; à multo namque tempore consueti , etiamsi deteriora fuerint , insuetis minùs turbare solent. Lac matris pueri succis nutritiis amicè jungitur , ut potè simile. Qui matris ubera fugit , vividior est ut plurimùm , & magis vitalis. Id ostendit Cutis æqualis , nullis aspera maculis , Habitus floridus , Caro firma , atque functionum Integritas. Non adeò felix conditio illius , quem nutrix alit conductitia. Insuetum enim lac , dum sanguini committitur , hunc commoveret & perturbat ; sanguinis motu alterato , renelli corporis functiones alterantur , nonnunquam ita pervertuntur , ut infantes vix acceptam vitam statim cum morte commutent : Aut si protrahitur vita , misera est , variis morbis obnoxia. Si alieni lactis novitate sic plectitur infans : quæ non ejus vitium secum trahet mala ? Mille aliis modis nocet infanti. Nutricum ægritudines cum lacte abeunt

4

in infantes : Epilepsia , Arthritis , Phthisis , Scorbutus , Lues vene-
nera , &c. Ipsarum etiam nutricum animi vitia (pro dolor !) Infan-
tibus communicantur. Libidinosa Libidinosum fingit , Iracunda Ira-
cundum , Ebriosa Ebriosum ; quæ vitia toto vitæ decursu vix eluuntur.

V.

PA R E N S legitimâ de causâ maternas partes adimplere ne-
quit ? Tunc summâ diligentiam advertat , cui munus suum peragen-
dum committat. Nutricem , si fieri potest , recens enixam eligat :
Colostri enim usu non solum puelli viscera purgantur , sed etiam
sensim lacti assuescit infans. Cum econtra , si lac crassius statim ex-
hibeatur , subitaneæ fiunt in teneri corporis liquoribus mutationes ,
semper periculosæ. Nutrix sit bene morata , animo tranquillo : Non
Stolida , non Iracunda , non Ebriosa , non Melancholica , non Salax ;
sit optimi habitûs , vividi & rosei coloris , nec obesa , nec gracilis ;
pectoris lati , mammarum mediocrium , quarum papillæ nec longæ
nimium , nec crassæ , sed mediocres , quas infans commodè sugere
possit ; ætatis sit ab anno vicesimo ad tricesimum quintum. Non
lusca sit , hujus dentes carioli non sint , non ejus anhelitus foeteat ,
nec ullâ mali labe contaminetur. Deest recens enixa Nutrix ;
præstò sint lenia medicamenta , quæ Colostri vires æmulentur ,
qualia sunt Tinctura Cassiæ , Serum lactis , aut similia , identidem in
os infantis ingerenda. Nec prius ad mammæ admoveatur puer ,
quàm meconii pars maxima ex intestinis dejecta fuerit. Primis die-
bus , non incrassante , non exsiccante cibo , sed refrigerantibus &
humequantibus alimentis vescatur nutrix , quibus fluidior fiat chylus :
ne nondum in puero satis patentes chyli viæ lacte crassiore obstruan-
tur. Lac eligatur nec nimis crassum , nec tenue , quod ungui impo-
situm , nec nimis hæreat , nec citius defluat : colore sit albo , odore
grato , sapore dulci. His sic provisus & ordinatis , alienis uberibus in-
fans innoxie admovebitur.

Ergo recens nato , lac recens enixæ matris.

Proponebat Parisiis STEPHANUS FRANCISCUS
GEOFFROY , Parisinus , Baccalaureus Medicus , Regiæ scien-
tiarum Academiæ Parisiensis , Regiæque Societatis Londinensis ,
Socius. A. R. S. H. 1703.

Apud Viduam Francisci Muguet , Regis & Facultatis Medicinæ Typographi.